

Comunidad kier haya informacion concreto:

Confusion y speculation so tin riba caso enigmatico "Holloway"

ORANJESTAD (AAN) — Opinion publico a sigui y lo continua duna comentario riba e caso Holloway te dia cu esaki worde resolve, cual sea cu e desenlace lo resulta. Den e transcurso di ayera

diferente persona a yama nos redaccion, pa muestra cu e pueblo kier informacion concreto pasobra ya e mesun cantica "cu no ta duna informacion pa no stroba e investigacion" ta di mas.

E comunidad ta sinti su mes bastante confundi pasobra di un banda husticia a prolonga e detencion di e dos hendenan homber cu ta worde asocia cu e desaparicion di e damita,

pero ainda no por compronde riba cual base nan ta deteni y te hasta e abogadonan cu ta representando e detenidonan ta asegura cu nan tin nada di haber cu e caso y incluso nan no a mira e hoben desapareci,

te ora cu e potret a sali den corant.

Un inkietud y alavez pregunta cu hopi hende na Aruba tin, ta pakico no a detene e tres hobennan cu kendenan e mucha muher a subi den taxi, y tambe pakico ni un hende ta scucha si na Birmingham algun investigacion por ta tumando lugar tambe, pasobra masha bon por ta cu eynan esun cu sa ta y no na Aruba.

Mientras tanto tin demasiado speculation den comunidad, y incluso tin hende ta mira "Natalee aki y Natalee aya", hopi ta kere cu e mucha ta na bida y scondi y hasta ta pidi pa e worde declara persona non grato na Aruba, mientras cu otronan ta pensa cu e hoben no ta na bida mas, y tin cu ta pensa cu el a bay for di Aruba den boto, y asina diferente version ta worde duna, pero realidad ta cu e caso ta un enigma.